



Convenio entre a Consellería de Cultura, Educación e Ordenación Universitaria e a Confederación Galega de Persoas con Discapacidade (COGAMI), sobre a colaboración educativa nas ensinanzas de formación profesional

En Santiago de Compostela, tres de xaneiro de dous mil trece

REUNIDOS

Dunha parte, don Jesús Vázquez Abad, conselleiro de Cultura, Educación e Ordenación Universitaria da Xunta de Galicia, en representación da mesma, e de conformidade coas atribucións conferidas no artigo 34.1 da Lei do Parlamento de Galicia 1/1983, do 22 de febreiro, reguladora da Xunta e do seu Presidente.

E doutra, don Anxo Antón Queiruga Vila, con D.N.I núm. 76.778.938-Q, Presidente da Confederación Galega de Persoas con Discapacidade (COGAMI), por acordo da XIII Asemblea Xeral Extraordinaria, celebrada o 16 de abril de 2011, con CIF G-32115941 e domicilio na cidade de Santiago de Compostela, Rúa Modesto Brocos, número 7, bloque 3, baixo, no exercicio das facultades que lle confire o artigo 36 e demais concordantes dos Estatutos da referida entidade.

Interveñen en función dos seus respectivos cargos e en exercicio das facultades que para convir, en nome das entidades que representan, teñen conferidas.



EXPOÑEN

1. Que a Lei Orgánica 2/2006, de 3 de maio, de Educación, determina no artigo 39 que a formación profesional, no sistema educativo, ten por finalidade preparar aos alumnos e as alumnas para a actividade nun campo profesional e facilitar a súa adaptación as modificacións laborais que poidan producirse ao longo da súa vida, así como contribuír ao seu desenvolvemento persoal e ao exercicio dunha cidadanía democrática.

Igualmente, contempla no apartado 2 do artigo 42, que o currículo das ensinanzas de formación profesional incluírá unha fase de formación práctica nos centros de traballo, da que poderán quedar exentos os que acrediten unha experiencia laboral que se corresponda cos estudos profesionais cursados.

2. Que a Lei Orgánica 5/2002, de 19 de xuño, das Cualificacións e da Formación Profesional, ten por obxecto a ordenación dun sistema integral de formación profesional, cualificación e acreditación que responda con eficacia e transparencia ás demandas sociais e económicas a través das diversas modalidades formativas. Con este fin créase o Sistema Nacional das Cualificacións e da Formación Profesional, e no seu marco orientaranse as accións formativas programadas e desenvolvidas en coordinación coas políticas activas de emprego e de fomento da libre circulación de traballadores.

3. Que o Decreto 114/2010, do 1 de xullo, polo que se establece a ordenación xeral da formación profesional do sistema educativo de Galicia, na súa disposición adicional segunda, contempla a relación coas empresas nos seguintes aspectos:

- a) A consellería con competencias en materia de educación promoverá a colaboración coas empresas e entidades empresarias e, en particular, coas máis implicadas en sectores clave da economía galega e as relacionadas cos sectores emerxentes.
- b) Esta colaboración ten a seguinte finalidade:
 - Realización do módulo de formación en centros de traballo.
 - Impartición de módulos profesionais incluídos en títulos de formación profesional ou módulos formativos incluídos en certificados de profesionalidade nas instalacións das empresas, co fin de garantir que a formación se realice cos equipamentos máis actuais.



- Uso polas empresas das instalacións e do equipamento dos centros, nas condicións que se determine, sempre que non interfiran no desenvolvemento das actividades docentes.
 - Actualización profesional dos traballadores e as traballadoras, así como do profesorado. Esta formación poderá incluír estadias temporais do profesorado nas empresas, tanto para a formación dos seus traballadores e das súas traballadoras como para a actualización do profesorado.
 - A validación das accións de formación desenvolvidas nas empresas, de acordo cos requisitos que se establezan, co fin de lles facilitar aos seus traballadores e ás súas traballadoras a obtención dun título de formación profesional.
 - Desenvolvemento conxunto de proxectos de innovación
- c) A colaboración formalizarase mediante convenio.

4. Este mesmo decreto establece:

- No seu artigo 33º que os centros educativos desenvolverán o currículo das ensinanzas de formación profesional de acordo coas características e as expectativas do alumnado, con especial atención ás necesidades daquelas persoas que presenten unha discapacidade, e as posibilidades formativas do medio, especialmente no módulo profesional de formación en centros de traballo, e reflectirano na programación xeral anual tendo en conta as necesidades de desenvolvemento económico, social e de recursos humanos do seu ámbito socioproductivo.
- No seu artigo 62º que a consellería con competencias en materia de educación garantizará que o alumnado poida acceder e cursar as ensinanzas de formación profesional que se regulan neste decreto nas condicións establecidas na disposición derradeira décima da Lei 51/2003, do 2 de decembro, de igualdade de oportunidades, non discriminación e accesibilidade universal das persoas con discapacidade.

5. Que COGAMI é un movemento asociativo consolidado e amplamente recoñecido pola sociedade en xeral, polos seus valores e liderado na procura de novas metodoloxías de traballo coas persoas con discapacidade e na prestación de servizos de excelencia dirixidos ás mesmas. E, ten como obxectivo a plena inclusión das persoas con discapacidade en



todos os ámbitos da sociedade, a través da defensa e promoción do cambio social, da potenciación do asociacionismo e da prestación de servizos que satisfagan as súas necesidades e expectativas.

Que os asinantes deste convenio están dispostos a prestar a colaboración necesaria no campo das ensinanzas de formación profesional e acordan subscribir este convenio, en base ás seguintes,

CLÁUSULAS

Primeira. Obxecto do convenio

O obxecto do presente convenio é establecer a colaboración no eido da formación profesional entre a Consellería de Cultura, Educación e Ordenación Universitaria e a Confederación Galega de Persoas con Discapacidade. Esta colaboración levarase a cabo nos seguintes campos de actuación:

- a. Establecemento dun programa de formación en centros de traballo, para alumnos que cursen formación profesional inicial e o desenvolvemento do mesmo nas instalacións das empresas pertencentes a COGAMI ou nas instalación de COGAMI.
- b. Creación dun programa de bolsas de formación por parte de COGAMI para alumnos de formación profesional inicial.
- c. Obtención de titulacións de formación profesional e certificados de profesionalidade por parte dos traballadores das empresas/de COGAMI, dentro do Plan de recoñecemento da experiencia profesional que desenvolve a consellería.

Segunda. Programa de formación en centros de traballo

Os centros que impartan ensinanzas de formación profesional formalizarán, para cada curso escolar, con COGAMI/ coas empresas pertencentes á COGAMI os alumnos que vaian realizar o módulo de formación en centros de traballo, previsto nos ciclos formativos, nas súas dependencias. Neste documento, determinarase o seu calendario e o seu horario, que terá que axustarse ao previsto no correspondente módulo (FCT).



O centro de traballo responsabilizarase da formación do alumnado, para o que designará aos titores responsables de cada área formativa. O centro educativo tamén designará un titor ou titores que colaborarán co titor da empresa na elaboración do programa formativo e no apoio técnico aos alumnos.

Cada alumno asistirá ao centro de traballo provisto da súa tarxeta de identificación ou D.N.I., e observará as normas do centro de traballo no tocante á puntualidade, asistencia e comportamento. COGAMI poderá desistir libremente de continuar a colaboración formativa, respecto de calquera alumno, por incumprimento das normas, abondando para iso unha comunicación escrita ao centro escolar, oído previamente o titor do mesmo.

O alumno non terá en ningún caso vinculación laboral con COGAMI, non podendo establecerse entre este e aquel ningunha relación contractual, nin sequera baixo as modalidades de contrato en prácticas ou para a formación, previstos nos artigos 11 e 12 do Real Decreto Lexislativo 1/1995, do 24 de marzo, polo que se aproba o texto refundido da Lei do Estatuto dos Traballadores, polo que os alumnos acollidos a este convenio quedan absolutamente excluídos da lexislación laboral. Durante o período de prácticas concertado non se poderá formalizar ningunha modalidade de contrato de traballo entre a empresa e o alumno, mentres non se revoque expresamente o concerto de colaboración formativa entre o centro educativo e a dirección da empresa, respecto dese alumno.

Os riscos por accidentes de traballo derivados da realización das prácticas, tanto se afectan ás cousas ou a terceiros coma ao propio alumno, incluídos os constitutivos de invalidez ou determinantes de morte, quedan cubertos por unha póliza de seguro colectivo adicional de carácter civil que ten subscrita a Consellería de Cultura, Educación e Ordenación Universitaria.

Terceira. Programa de bolsas de formación

COGAMI creará un programa de bolsas de formación para cada curso académico destinadas a aquel alumnado, especialmente sobresaínte e titulado en ciclos formativos de formación profesional, que realizara o módulo de formación en centros de traballo nas empresas pertencentes a Cogami.

COGAMI fixará as bases de cada convocatoria na que se contemplará os criterios de selección, o importe da bolsa, a súa duración, que oscilará entre dous meses e un ano, a



subscrición do seguro de accidentes e demais condicións do programa de bolsas de formación.

Cuarta. Recoñecemento da experiencia laboral dos traballadores de COGAMI

Dentro do Plan de recoñecemento da experiencia profesional, a Consellería de Cultura, Educación e Ordenación Universitaria analizará con COGAMI a posibilidade de acreditar a experiencia profesional dos traballadores das empresas de COGAMI, e convocar aquelas cualificacións profesionais vinculadas a determinados postos de traballo de COGAMI.

Quinta. Outras colaboracións

Establecemento doutras liñas de colaboración entre a consellería e COGAMI, para a mellora da calidade destas ensinanzas, como a promoción do emprendemento entre o alumnado, xa sexa a través de charlas sobre as experiencias da mocidade emprendedora como de calquera outra iniciativa.

Sexta. Comisión de seguimento

Establecerase unha comisión de seguimento, control e supervisión, que se reunirá cando se considere oportuno por calquera das partes asinantes.

Esta comisión estará constituída por:

- A. Tres representantes da Consellería de Cultura, Educación e Ordenación Universitaria.
- B. Tres representantes de COGAMI.
- C. Un funcionario da Consellería de Cultura, Educación e Ordenación Universitaria que actuará como secretario.

Sétima. Vixencia do convenio

O convenio entrará en vigor na data da súa sinatura e terá unha vixencia de dous anos, podendo prorrogarse por acordo das partes mediante a addenda correspondente. Non obstante, o convenio poderá denunciarse por calquera das partes; a denuncia deberá realizarse por escrito e con dous meses de antelación á finalización do convenio.



Oitava. Carácter administrativo do convenio

O presente convenio de colaboración posúe carácter administrativo por razón do contido e materias sobre as que o mesmo versa, as cales ao abeiro do disposto no artigo 4.1 e 2, do Real Decreto Lexislativo 3/2011, de 14 de novembro, polo que se aproba o texto refundido da Lei de Contratos do Sector Público, o exclúe do seu ámbito de aplicación, sen prexuízo da aplicación dos principios desta para resolver as lagoas ou dúbidas que a súa aplicación suscite.

Dada a natureza administrativa deste instrumento xurídico, as controversias ou cuestións litixiosas que puideran xurdir na súa aplicación e non puidesen ser solucionadas no seo da comisión de seguimento, serán resoltas pola xurisdición contencioso-administrativa.

Lido o presente convenio, atópano conforme e asínano na lugar e data indicados.

**O Conselleiro de Cultura, Educación
e Ordenación Universitaria**

**O Presidente da Confederación Galega de
Persoas con Discapacidade (COGAMI)**

Asdo.: Jesús Vázquez Abad

Asdo.: Anxo Queiruga Vila